

# Pengerusi Bank Bumi, Malayan Banking ditukar

**KUALA LUMPUR, Jumaat** — Sumber-sumber yang layak dipercayai memberitahu, Pengerusi MARA, Dr. Nawawi Mat Awin dijangka mengambilalih tugas Tan Sri Kamarul Ariffin sebagai Pengerusi dan Ketua Eksekutif Bank Bumiputera.

Di Malayan Banking pula, Datuk Jaafar Hussain, pengongsi kanan dan Ketua Kawasan Firma Perakaunan Price Waterhouse, akan dilantik sebagai pengerusi eksekutif, menggantikan Tan Sri Taib Andak.

Beberapa eksekutif pentadbiran kanan lain dalam kedua bank yang dikuasai kerajaan itu juga dijangka sama ada akan bersara atau berpindah.

Dalam masa enam bulan selepas rombakan ini, pihak lembaga kedua bank itu akan disusun semula, menggantikan ahli-ahli lama dengan 'profesional muda yang dinamis', kata satu sumber bank.

Difahamkan, Perdana Menteri, Datuk Seri Dr. Mahathir Mohamad membuat keputusan tersebut kira-kira sebulan lalu.

Kerajaan dijangka membuat pengumuman rasmi mengenai rombakan tersebut pertengahan bulan ini.

Rombakan di Bank Bumiputera, yang ditempatkan di tangga 286 dalam senarai 500 bank terbesar di dunia, dan Malayan Banking, di tempat 371, telah lama diduga.

Pertukaran Pengerusi Bank Bumiputera diperkatakan sejak setahun lalu.

Tan Sri Kamarul dijangka mengetuai Perbadanan Industri-Industri Berat Malaysia yang baru ditubuhkan.

Difahamkan, Tan Sri Ismail Ali, Pengerusi PNB yang menguasai 70 peratus saham Bank Bumiputera dan 51 peratus saham Malayan Banking, menulis kepada Lembaga Pengarah Malayan Banking menyatakan 'hasratnya' mengenai kedudukan Datuk Jaafar di dalam lembaga itu.

Sebagai akauntan kanan bertauliah, perantikan Datuk Jaafar sebagai pengerusi eksekutif disifatkan semata-mata berdasarkan kepada 'keupayaan'.

Tan Sri Taib Andak dijangka bersara penghujung bulan ini mengosongkan jawatan yang dipegangnya sejak Ogos 1969.

Jutawan Datuk Khoo Kay Peng yang kini naib pengerusi eksekutif dan juga pengerusi jawatankuasa kewangan, pengarah eksekutif badan pengawal bank, Raja Badrol Ahmad juga dijangka terlibat dengan rombakan yang akan dilakukan.

Dr. Nawawi yang dilantik menduduki Majlis Tertinggi UMNO baru-baru ini juga akauntan bertauliah dengan Ph. D di bidang ekonomi, dijangka meneruskan dasar Bank Bumiputera yang diakui kemantapannya. Bagaimanapun, difahamkan, kegiatan Malayan Banking akan diselaraskan dengan Dasar Ekonomi Baru.